

12 SEP 2003

BAJET-SEKURITI/I

LAYANAN CUKAI BAGI TERBITAN SEKURITI ISLAM

KUALA LUMPUR, 12 Sept (Bernama) -- Kerajaan bercadang memberikan layanan cukai kepada urusanniaga berkaitan pembiayaan menerusi terbitan sekuriti Islam sebagai satu langkah untuk mempelbagaikan sumber pembiayaan dalam pasaran modal, kata Perdana Menteri Datuk Seri Dr Mahathir Mohamad.

Layanan cukai akan dilaksanakan bagi Akta Cukai Pendapatan 1967 dan Akta Penggalakan Pelaburan 1986 di mana penjualan aset oleh pihak yang memerlukan pembiayaan kepada jentera tujuan khas (SPV) dan penjualan semula aset kepada pihak tersebut tidak akan dianggap sebagai jualan bagi tujuan cukai pendapatan, katanya ketika membentangkan Belanjawan 2004 di Parlimen, di sini, hari ini.

Sementara dalam kes yang melibatkan pajakan semula aset yang sama SPV kepada pihak yang memerlukan pembiayaan, pajakan tersebut tidak dianggap sebagai jualan di bawah Peraturan-Peraturan Pajakan Cukai Pendapatan 1986, dan penerbitan sekuriti Islam oleh SPV adalah mengikut layanan yang sama sepertimana yang dicadangkan bagi sekuriti bersandarkan aset.

Untuk menggalakkan penerbitan sekuriti Islam, adalah dicadangkan potongan cukai diberi selama 5 tahun ke atas perbelanjaan yang dilakukan dalam penerbitan sekuriti 'Istisna' di mana aset hartanah dalam pembinaan boleh dijadikan sandaran.

Sementara itu, keuntungan yang diperolehi daripada pelupusan sekuriti Islam yang merupakan aset kena cukai oleh pelabur adalah dikecualikan daripada keuntungan hartanah di bawah Akta Cukai Keuntungan Harta Tanah 1976.

Duti setem akan dikecualikan bagi surat cara pemindahan aset oleh pihak yang memerlukan pembiayaan kepada SPV untuk tujuan dipajakkan semula dibawah penerbitan sekuriti Islam.

Bagi akta lain, pihak yang memerlukan pembiayaan akan terus menikmati pengecualian duti/cukai di bawah Akta Kastam 1967, Akta Cukai Jualan 1972 dan Akta Eksais 1976 tertakluk kepada pihak tersebut masih menjalankan perniagaan dalam aktiviti yang diluluskan. -- BERNAMA

PK TJK ZK